

# Statüts

## ***Da la corporaziun evangelica da Zernez***

Quists statüts as basan a la constituziun da la baselgia evangelica refuormada dal Chantun Grischun ed a l'uorden davart l'organisaziun e la vita illas raspadas da la baselgia evangelica refuormada dal Chantun Grischun.

## **A: Dispusiziuns Generalas**

### ***1. La corporaziun***

- art. 1 La corporaziun evangelica da Zernez es respunsabla per la vita da la baselgia evangelica illa raspada da Zernez cun sias fracziuns Brail, Lavin, Susch e Zernez. Ella es respunsabla surtuot da spordscher regularmaing cults divins, l'instrucziun da religiun, la chüra d'ormas e la diaconia. Ella es respunsabla eir pel possess chi tilla es affidada. Ella cooperescha per incumbenzas da la baselgia in general. Singulas incumbenzas po ella schoglier eir in collavuraziun cun otras corporaziuns illa regiun.
- art. 2 La corporaziun evangelica da Zernez es commembra da la baselgia evangelica refuormada dal chantun Grischun.
- art. 3 A la corporaziun evangelica da Zernez appartegnan tuot las personas da confessiun evangelica cun domicil i'l cumün politic da Zernez. (tenor la constituziun da la baselgia chantunala art. 4 e 36-38)
- art. 4 Dret da vuschar han, independentamaing da lur naziunalità, tuot las personas commembras chi han cumpli lur 16avel anniversari e chi accumulischan ultra da quai las premissas per ün dret da vuschar politic.  
Cun 18 ons es accumulida l'età per pudair eir gnir elet in caricas.
- art. 5 In tuot las fatschendas da la raspada vegn fat adöver dal rumantsch ladin (vallader e puter). Da vart da singulas excepziuns po decider il consistori.  
Dapertuot ingiò cha in quists statüts vegnan dovradas be la fuorma feminila o quella masculina per personas sun adüna maniadas tuottas duos fuormas. Las schlattas sun egualas in lur drets ed obligs invers la corporaziun.

## **B: Ils organs da la corporaziun**

- art. 6 Ils organs da la corporaziun sun:
1. la radunanza da la corporaziun
  2. Il consistori e sias cumischiuns
  3. ils revisuors da quint
  4. l'uffizi da pravenda

## **2. La radunanza da la corporaziun**

- art. 7 La radunanza ordinaria da la corporaziun ha lö minch'on da prümavaira.
- art. 8 Üna radunanza extraordinaria po gnir convocada dal consistori, o gnir pretaisa sün giavüsch d'almain 30 commembers da la raspada chi inoltreschan in scrit lur motivaziun detagliada.
- art. 9 L'invid a las radunanzas da la corporaziun vegn fat in scrit almain 8 dis avant la radunanza e cuntegna las tractandas e las indicaziuns necessarias per trattar quellas.  
Mincha radunanza convocada tenor regla es abla da decider.
- art. 10 La radunanza da la corporaziun ha las seguaintas incumbenzas e cumpetenzas:
- a) d'approvar il protocol da l'ultima radunanza
  - b) d'approvar il rapport dal president
  - c) d'approvar il rendaquint ed il rapport dals revisuors da quint
  - d) d'approvar il preventiv e fixar il pè d'impostas da la raspada
  - e) da tscherner il president, commembers dal consistori ed ils revisuors da quint
  - f) da tscherner e licenzchar ravarendas
  - g) da reveder e relaschar statüts da la corporaziun
  - h) da decretar uordens e ledschas da la corporaziun
  - i) da deliberar propostas dal consistori
  - j) da deliberar propostas a man dal colloqui o dal cussagl da baselgia chantunal
  - k) da decider davart collavuraziuns cun otras corporaziuns
- art. 11 Mincha persuna commembra cun dret da vuschar po inoltrar propostas a man da la radunanza. Quellas han da gnir inoltradas in scrit almain fin als 15 da marz. Propostas our dal ravuogl da la radunanza vegnan tuttas incunter dal consistori e vegnan tractandadas per la prosma radunanza.
- art. 12 La radunanza decida cun majorità da vuschs. Votaziuns vegnan fatas avertas sch'ün preschaint nu pretenda scrutin. Elecziuns vegnan fattas per scrutin, la radunanza po però eir vuschar giò e decider da far quellas cun vusch averta. Pro equalità da vuschs es la proposta sbüttada. Sur da fatschendas na tractandadas nu po la radunanza decider. Dad entrar sün dumondas da reponderaziun vegna decisas cun duos terz da las vuschs. Ultra da que valan pro votaziuns ed elecziuns las reglas stipuladas illa ledscha davart ils drets politics dal chantun Grischun.

## **3. Il consistori**

- art. 13 Al consistori fan part 5 personas: Ün president, l'actuarat ed il vicepresidi sun units in üna persuna e trais personas sun assessuors. I vegn tschernü in carica il president, chi'd es eir delegà al colloqui. Ils ulteriurs quatter commembers as constituishan s'vess. Ils differents decasteris da la raspada vegnan scumpartits e comunicats i'l organ da la raspada sco eir a la baselgia chantunala. Ils commembers dal consistori vegnan elets per üna dürada d'uffizi da trais ons. Els pon gnir reeletts i'l consistori 2 voutas (in tuot 9 ons), sch'ün commember dvainta president po el lura eir gnir reelet amo 2 voutas (i vain cumanzà da nouv a dombrar ils 9 ons).

art. 14 Il consistori as raduna in seguit ad ün invid dal presidi obain scha duos oters commembers giavüschan que. Scha almain 3 commembras sun preschaintas es il consistori abel da decider. Il ravarenda da la raspada po gnir invidà a las sezzüdas dal consistori cun vusch consultativa.

art. 15 Il consistori es l'organ executiv da la corporaziun e sias competenzas e lezchas sun las seguaintas:

- a) rapreschantar la corporaziun vers l'extern
- b) exeguir decisiuns da la radunanza
- c) preperar las tractandas per la radunanza e bannir quella
- d) eleger provisurs ed organisar collavuraziuns d'urant vacanzas dal ravarenda
- e) eleger cumischiuns per singuls decasteris o per lezchas da la raspada
- f) eleger persunas per lezchas specialas
- g) preparar la tscherna dal ravarenda ed avisar quella al cussagl da baselgia chantunal
- h) stipular contrats cul ravarenda ed oter personal da la corporaziun
- i) survegliar l'instrucziun da religiun e da confirmaziun e decider sur da dumondas d'admissiun a la confirmaziun
- j) sustegner e survegliar tuot ils collavuratuors da la raspada in lur lezchas
- k) survegliar l'administraziun da l'archiv da la pravenda
- l) administrar la facultà da la corporaziun, pisserar pel mantegnimaint da la substanza e preschantar minch'on ün rendaquint a la radunanza
- m) collavurar in general culla baselgia ed exeguir decrets da la baselgia chantunala
- n) decider sur dad expensas unicas fin a l'import da 5000 francs e da quellas chi's repetan fin a l'import da 1000 francs.

#### ***4. Ils revisuors da quint***

art.16 Il revisorat consista da trais revisuors chi vegnan eir tschernüts per üna perioda d'uffizi da trais ons. Els sun reelegibels sainza limita. Almain duos d'els revedan minch'on il quint da la corporaziun e surveglian l'andamaint da la gestiun. Els preparan lura ün rapport a man da la radunanza.

#### ***5. L'uffizi da pravenda***

art. 17 Il ravarenda es in servezzan da la corporaziun. Seis dovairs e sias incumbenzas sun illa predicaziun, l'instrucziun e la pastoraziun cun chüra d'ormas e diaconia. Sias lezchas accumulscha il ravarenda in responsabilità invers il Segner e la baselgia, in basa da constituziun e ledschas da la baselgia chantunala e da la corporaziun. Il ravarenda collavura cul consistori e culs ulteriurs collavuratuors da la corporaziun. Sias cundiziuns da lavur vegnan regladas i'l contrat ed i'l quadern da lavur.

#### ***6. Ulteriurs incumbensats per la corporaziun***

art. 18 Ils organists ed ils culuosters vegnan tschernüts dal consistori. Eir tuot las otras persunas chi surpiglian incumbenzas d'instrucziun per la corporaziun o chi surpiglian qualsia incumbenza per la corporaziun vegnan tschernüdas dal consistori. Il personal da la raspada survegn ün contrat da lavur, i'l qual i vegnan stipuladas las cundiziuns da lavur e decleradas las

incumbenzas e las competenzas. I valan las directivas per collavuratuors da la baselgia chantunala.

## C Disposiziuns finalas

art. 19 Per tuot las dumondas chi nu vegnan regladas in quists statüts, sun impegnativas las ledschas e las regulaziuns da la baselgia chantunala Grischuna.

art. 20 Quists statüts da la corporaziun pon gnir revais, müdats o cumpletats da tuots temps, adüna scha üna majorità da duos terz dals commembers preschaints ad üna radunanza dumondan quai o scha'l consistori propuona da sai oura quai. Dumondas da müdamaint han da gnir examinadas dal consistori e preschantadas a la prosma radunanza per decider.

art. 21 Quists statüts da la corporaziun evangelica da Zernez aintran in vigur als 1. da schner dal 2016, davo esser gnüts acceptats a la radunanza da constituziun da la corporaziun evangelica da Zernez, als 18 november 2015, e davo esser approvats eir dal cussagl da la baselgia evangelic-refuormada dal chantun Grischun. Els rimplazzan tuot ils statüts plü vegls da minchüna da las corporaziuns evangelicas da Lavin, da Lavin-Guarda, da Susch e da Zernez/Brail.

In nom da la corporaziun evangelica da Zernez, als .....

Il president

L'actuar

Approvà dal cussagl da baselgia chantunal, als .....

Il president

L'actuar